

9. august 2013

UKA 2013/34

Inatsisartut suleriaasianni § 33 naapertorlugu, aalajangiiffigisassatut siunnersuut imaattoq matumuuna saqqummiuppara:

Inissianik attartortut piffissaq eqqorlugu akiliuteqartartut siunissami attartortunut akilineq ajortunut akiliussarnerannik aningaasartuutinullu taakku akilinngisaannik akiliisarnerannik pisussaaffeerullugit, inissianik akiliutit aalajangersarneqartarnerat pillugu maleruagassanut atuuttunut Naalakkersuisut allannguutissaannik siunnersuusiornissaat pillugu Inatsisartuni aalajangiiffigisassatut siunnersuut.

(Inatsisartunut ilaasortat Kim Kielsen, Siumut)

Tunngavilersuut:

Inissiami ineqartuit, inigisannullu pisussaaffiit naapertorlugu akiliisarlutit, taava ullumikkut ineqarnermut akiliuteqartarnerup aalajangersarneqartarnera pillugu maleruagassat naapertorlugit assersuutigalugu najugaqarfimmi najugaqarfigisanni najugaqartut allat piffissaq eqqorlugu ineqarnermut akiliisimangippata, najugaqarfiniluunniit inissiaq attartugassaq piffissami sivikinnerusumi sivilunerusumiluunniit inoqarsimangippat, ineqarnermut annertunermik akiliinissannut piumaffigineqassaatit.

Sooq nunatsinni inissianik attartortorpassuit tatiginartut nunatsinni inissianik attartortut akiliutinik paarsineq ajortut akiligassaasa annertoqqataannik imaluunniit inissianik aqutsinerup pitsaanngitsuunera pissutigalugu akiliisinneqartarnissaat apeqqutigerusunnarpoq. Attartortut ilaasa inissianut attartukkaminut akiliisinnaannginnerat akileerusunnginneralluunniit patsisigalugu imaluunniit inissiat attartortinneqartartut piffissami sivikinnerusumi sivilunerusumiluunniit inoqanngittarnerat inissianut attartortunut akilersuilluartunut aningaasatigut nammakkiutigineqarnissaa pissusissamisoorpa? Siumut isumaqarpoq tamanna naapertuilluarnerunanilu pissusissamisunnngitsoq.

Inatsisartunut ilaasortap Malik Berthelsenip § 37 naapertorlugu apeqqutaanut nr. 136-imut tunngatillugu Naalakkersuisut akissuterqarnerminni ima allapput:

***Apeqquut 1.** Inissiani Pisortat pigisaanni ineqarnerminnut akilineq ajortut akiliutissaralui Pisortanit isertitassatut annaaneqartut, immikkoortortami najugaqataannut (boligafdeling) akiligassanngortinneqartarneri Naalakkersuisunit pissusissamisoortutut isigineqarpa?*

***AKISSUT:** Ilisimatitsissutigisinnaavara, tassani inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq malinneqarluinnarmat, tassami § 28-mi allassimavoq, "Namminersornerullutik Oqartussat kommunillu ilaqutariinnut arlalinnut illuutaanni najugaqatigiiffimmi inissianik attartortitsinermit isertitat tamakkiisut sukkuilluunniit annertussusilerneqarnerini, najugaqatigiiffiup aningaasartuutinik tamanik akiliisinnaanissaa periarfissinneqassaaq, matumani ilanngullugit aningaasaliissutinit iluanaarutinit illumik*

piginnittumut akiliutitut aningaasartuutit, tak. § 31, aamma ingerlatsineranut atatillugu aningaasartuutit, matumani ilanngullugit allaffissornikkut aqutsineranut akiliutit, tak. § 32, imm. 1-6, aserortersarnermik pinaveersaartitsineranut akiliutit, tak. § 32, imm. 7, aamma akiliutissatut illuartitallu aalajangikkat."

Naalackersuisut akissuteqarnerminni naalackersuineranut tunngatillugu akissuteqarnatik, kisiannili maleruagassanut innersuussinnarnerat maluginiarneqarpoq.

Inissianik attartornermi akinik aalajangersaarsarnerup taassuma ajornartorsiutaanera nammaqatigiinnermut attuumassuteqanngilaq. Illuatungaagulli inissiamut attartornerminnik akiligassaminik paarsilluartut inissianut akiliutinut akilinngitsuukkanut inissianilluunniit attartortittakkanik aqutsinerlunnermut tunngatillugu akiliutinik qaavatigut akiliisinaqartarnerat nammaqatigiilluarnertut taaneqarsinnaanngilluinnarpoq.

Isumaginninnermut tunngatillugu pitsaasumik nammaqatigiinnermillu toqqammaveeqartumik isumalluuteqarlutalu maleruagassaqpugut, taakkulu attartortunut imminnut pilersorsinnaanngitsunut ikiuinermi atorveqartarput, tassungalu ilanngullugu aamma piffissami aalajangersimasumi inissiamut akilersukkanik akiliisinnaanngiffimmi.

Taamattaaq inissiamik attartortakkamik nutsernermut atatillugu qularnaveeqqusiineranut akiliisarnermut pitsaasunik malittarisassaqpugut. Qularnaveeqqutit taakku ilaatigut ineqarnermut akiliinngitsoorsinnaanermut qulanaveeqqutit atorveqarput.

Akilerartartoq akilersuilluartoq sanilip akilerarutitut akilinngitsuugaanut, imaluunniit peqquserluutaanut akiliisikkaanni, tamanna nammaqatigiinnertut taaneqarsinnaava? Naamik ilaa?

Inissianik attartorneq pillugu Inatsisartut peqqussutaat nr. 2, 2. maj 2005-imeersumi allanilu attartortitsinermi inatsisini ineqartut ineqarnerminnut atatillugu aningaasatigut nammakkorsorlugit pillarneqartarnerannik periutsit allanngortittariaqarput.

Neruppunga siunnersuut una pitsaasumik tunngaviumik oqallinnermik pilersitsiffiullunilu ataatsimiititaliami naleqquttumi suliarinninnermik kinguneqarumaartoq. Ataatsimiititaliamissaq qanoq ililluni inissianut akiliisarnerup patajaallisarneqarsinnaanera kiisalu inissiat inoqaratik aserfallakkiaartunnginnissaat pinngitsoortinniarlugu attartortitsisut inissianik attartortut atuinerinik qanoq iliorlutik pitsanngorsaasinnaanerat oqallisigineqarsinnaapput. Tamannalu ingammik piffissami inissianik atuinerup patajaallsiarnissaanik attartortittakkanillu ingerlatsinerup pitsanngorsarnissaanik pisariaqartitsiviumi pingaaruteqarpoq.

Pisortanut aningaasatigut allaffissornikkullu kinguneqaatit

Attartortut piffissaq eqqorlugi akiliisarnerinik pisortat attartortitsisutut qulakkeerinninngikkunik imaluunniit pisortat inaataannik allaffissornikkut aqutsinermik pitsanngorsaanngikkunik, pisortat aningaasatigut eqqugaasinnaapput. Pisortat inissianik attartornermut akiliutit akilersinnarnerinut allaffissornikkut aqutsinermik patajaallisarnissaanut piumaffigineqarsinnaapput, soorlutaaq inissiat inoqaratik uninngaannarnissaat pinaveersaartinniarlugu inissiat atorveqarnerat qulakkeerneqassasoq pisortat piumaffigineqarsinnaasut.

Namminersorlutik inuussutissarsiortunut aningaasatigut allaffissornikkullu kinguneqaatit

Namminersorlutik inuussutissarsiortut inissianik attartornerisa annertussusaat apeqqutaalluni, taakku aamma attartortut akiliisarnissaannik qulakkeerinninnginnermikkut kiisalu inissiat attartortinneqartartut allaffissornikkut isumagineqarnernik pitsanngorsaannermut aningaasatigut nammakkersorneqarsinnaapput.

Innuttanut aningaasatigut allaffissornikkullu kinguneqaatit

Inissanut akilersuilluartartut allat inissiamut attartornerannut akilinngitsuugaannut imaluunniit inissiat aquunerlunneqarnerannut akiliisarunnaarnermikkut inissianut akilersuutitigut ileqqaaruteqassapput.